

臣朱壽朋敬編

臣潘鴻鼎恭校

秋七月甲午朔日有食之○時享 太廟 上親詣行禮○丁酉諭順天府奏東南兩路各州縣被水現辦大概情形一摺本年六月二十三日永定河漫口大興宛平東安武清永清等縣地方被水災民亟須撫恤業經孫家鼐等派員前往查勘辦理急賑仍著速籌欸項妥爲接濟毋令災民失所所有湖南應解漕折銀兩並各省每年應解備荒經費銀兩卽著戶部迅速開單咨行各督撫飭令如數解部不得因循拖欠致誤賑需○諭王文韶奏永定河堤工漫口分別參辦並自請議處一摺本年六月後大雨時行永定河水勢急漲險工迭出二十三日北六工之八號堤頂漫溢二十四日北中汛七號又復漫水掣奪全河大溜口門寬刷數丈餘該管各員疏於防範實屬咎無可辭調署北中汛武清縣縣丞支兆熊著革職留工効力石景山同知張恩謹著革職留任廳員下北岸通判蔡廷皋汛員北六工霸州州判陳麗生均著摘去頂戴永定河道陳慶滋河防局道員寶延馨均著革職留任會辦河防局道員張蓮芬著摘去頂戴王文韶著交部議處該督務當督率在工員弁將漫口速籌堵築並將南岸各汛嚴飭極力防護不得

再有疏虞所有被淹村莊卽著該督迅速查明妥籌撫恤毋令失所○戊戌張汝梅奏陝省清查荒田所有辦理情形業經臣先後具奏在案現查各屬印委均屬實力奉行略有端倪惟查陝西荒地數十年來疊經整頓卒未能盡闢者其故實有數端請爲我皇上縷晰陳之當初兵災以後繼以大祲百姓流亡殆盡嗣經多方安輯終難復舊此地曠人稀荒地未能盡闢者一也通省土產雜糧居多北山一帶氣候過差夏寒霜早穡事多不可靠卽平川地面水土稍佳然人少工貴卽使豐收而人少穀賤仍屬得不償失此荒地未能盡闢者又一也農民擇地而耕非有可靠之利孰肯株守因此種荒地墾時工費不支熟後穀價太廉偶遇偏災卽棄而他往故認墾之戶不惟客民多無室家去留無定卽土著亦旋墾旋廢作輟靡常此招墾之難荒地未能盡闢者又一也以上各節均屬實在情形經臣等悉心籌畫更定章程僅能使已墾匿報者自首不究既往客民認墾者無虞土民攘奪而已若夫墾闢之難易收穫之豐儉土著之能否力耕無廢客民之能否安此樂郊皆在懸虛莫必之數安能保其不既墾而復荒乎而州縣一經招墾限滿升科卽應歸入額數併計徵不足額則處分基嚴田無人種則追呼乏術以故各牧令現雖不敢不認真查報而皆惴惴焉以將來之考成爲慮此情實有可原不得不加之體恤臣等再四熟籌欲求地不復荒須使農有餘力必墾戶之土著者足以自存客居者安有家室以後自無棄地而逃之患然此

非旦夕所能責效伏思催科政拙州縣之責難寬而因時制宜經權所當並用與其拘守例章使懷疑懼未免敷衍莫若寬以期限俾得展舒較有實際擬請將自首及新墾各戶分別於首報及墾限屆滿之日起應定升科錢糧予限三年作為另案徵解不入額數考核限內墾戶逃亡熟地復荒免其議處一俟限滿即將升科未荒之地按照例章歸入額數核辦如此則各牧令無所顧慮可以放手辦理必能日起有功而限滿未荒之地升科已歷三年自係確可久種從此額賦永增似覺公私交益下戶部知之○庚子予故直隸按察使朱靖旬政績交國史館列入循吏傳○諭桂斌等奏撞騙貢使案內訊出要證楚勒圖木供詞請旨辦理一摺此案前據桂斌等參奏當經諭令步軍統領衙門按名嚴傳送交理藩院研訊所有案內之劉達喇嘛依什扎勒參等曾否到案著理藩院查訊具奏楚勒圖木著解京交理藩院質訊○辛丑 上詣 醇賢親王園寓 皇本生妣金棺前行禮○允李鴻藻請予假一月調理以許應騤署禮部尚書○以創修吉林志告成獎敘出力人員同知郭鈞銘等有差○壬寅 上詣建福宮 孝貞顯皇后聖容前行禮○准安徽巡撫福潤開缺回旗調理○癸卯戶部奏查上年十月間奏撥本年京餉銀七百萬兩嗣因部庫存款無多每月放款甚鉅當於本年三月間援案添撥銀一百萬兩共銀八百萬兩均限五月前解到一半年底一律解清先後奏准行知各省關遵照在案今查截至本年底止除劃撥

及已解報解過半並劃撥已解報解起程及半各欸外其解不及半暨絲毫未解各省關本應分別參處
第念本年五月以前放欸尙無貽誤仍請照案暫免開參總計本年原撥續撥京餉各省關未解共銀五
百四十二萬兩分晰繕具清單恭呈 御覽惟部庫現存正項爲數無多開放時虞不敷各省關若再報
解遲延實有支應不及之慮相應請 旨飭各該督撫將軍鹽政藩司運司鹽道監督等各將未解京餉
趕緊陸續提前解部以供開放統於年內掃數解齊倘再諉卸拖欠致誤要需 臣部定行照章參辦其現
在解不及半絲毫未解等處經此次奏催後仍不完解卽由 臣部隨時指名嚴參 上諭戶部奏請旨催
解京餉一摺本年京餉原撥續撥共銀八百萬兩截至五月底止除劃撥解到及報解起程外尙欠解銀
五百四十二萬兩現在部庫支絀應放各欸均關緊要所有各省關欠解京餉亟應全數報解以應要需
著該將軍督撫等各將欠解銀兩趕緊陸續提前解部統於年內掃數解齊倘敢諉卸拖欠卽由戶部照
章參奏其解不及半及絲毫未解等處經此次嚴催後倘仍不完解卽著戶部隨時指名嚴參○孔令貽
奏 臣准前署兩江總督張之洞咨稱准戶部咨光緒二十年十一月初四日內閣奉 上諭翰林院侍讀
王懿榮奏請飭整理衍聖公府地產一摺著戶部行咨兩江總督江蘇山東各巡撫按照原奏各節分析
查清如數撥補等因欽此欽遵查辦去後茲據查明衍聖公府祀田係於元至元三十一年撥有沛縣秦

家莊六十頃刁陽里三千大畝載在元碑久經湮沒惟既欽奉 特旨擬循照元碑所載撥還計一大畝

卽江省之三畝除同治八年已撥八頃外其餘一百四十二頃以各團上則之地補足歲租每年由衍聖

公府派人赴徐州道領取業經奏明辦理等因知照前來臣當卽恭設香案望 闕叩頭祇謝 天恩詔

伏念臣此項祀田地屬淮南壤連泗上黃流改道淪巨浸者百年紅粟登倉闕明湮者累葉昔在同治年

間曾經撥歸八頃茲復恭承 溫詔悉數籌還以徐防有限之餉糈供闕里常徵之齋米分溝晝晷遵元

代之區方食稅衣租俾疆臣爲經理凡此 隆施之優渥均非寤寐所敢期臣惟有敬謹藏儲誦揚前烈

繹天保吉蠲之美知圭田明德之馨績史晨奉祀之碑頌 聖代 作人之化以期仰答 高厚鴻慈於

萬一報聞○甲辰以鄧華熙爲安徽巡撫○諭御史宋伯魯奏五城咨送竊案如贓證不符請由刑部仍

咨該城御史查覆毋庸票傳司坊官赴部面質等語著刑部妥議具奏○宋伯魯奏黃河爲北條巨瀆挾

山陝晉豫直東諸水東流入海勢大力猛本易爲患而水行中幹則治之尤難北幹經河津千餘里瀦蓄

有所宣洩多途禹跡縱不可尋古意猶可識也南幹由雲梯關入海路左多山且千餘里中土皆膠黏任

堤束水以水攻沙尙易爲治若中幹則地勢迫狹土性鬆緩徒以恐壞運道之故不得已而出此然使在

事各員人人實力奉公未嘗不可爲一勞永逸之計無如始勤終怠百弊叢生各便身圖罔知大局遂使

公帑民命盡赴東流殊可慨也然則中幹遂不可治乎曰可惟有認真而已查近年山東河務幾於無年不報決口甚或一年數報或一報而三四處煩 聖主之焦勞勤司農之策畫撥款議賑年復一年不知帑藏猶易復者也最可憫者百姓耳當夫決口之時水高數十丈壁立而行瞬息千里田園村舍當之者立變澤國浮屍蔽水順流而下或挂樹杪或觸寨樓其有幸逢漁舟貨艇他鄉遇救者百無一二田廬漂沒今年之餬口無資文契蕩然後日之生理亦盡推原其故皆由在工各員不肯實心任事以至於此若不革除積弊將帑儲終無由而節而民命終無由而蘇臣於前歲恭膺 恩命課試山東試竣後留心咨訪頗知一二謹就管見所及敬爲我 皇上陳之一侵蝕官款冒領朦銷宜嚴定處分也河工以人夫土料爲集事之資與軍營中器械糧餉無異一有侵冒夫料不能應手卒至債事者多矣然未聞有因侵冒指名糾參者足見欺朦相尙積弊已深不知他事侵冒不過貪黷而已至於軍務則勝敗攸關河工乃民生所繫稍有貽誤禍不旋踵近日軍中侵冒之弊屢奉 嚴旨切責申明憲典河工侵冒事同一律擬請旨飭下河務省分凡遇此等劣員指名嚴參卽照刑部議覆軍營剋扣侵冒律例一體治罪庶涓滴皆歸工上而公帑與民生交受其益矣一收發正雜各料宜設法稽察也河工委員以收支總局外局料場差使爲最優賈稽椿蒜土差使次之凡差使未派之時重賄營謀巧取豪奪所以然者一經派買土料先

與夫頭料販鉤通一氣講明五成報官或大成報官然後購買堆置岸上排架高聳名曰料垛然後稟請收支局委員驗收委員到岸不過一望卽會銜稟報不知料垛皆中空也名爲每垛萬斤或幾千根實不過四五成也而以餘款瓜分入己此等委員每派差一年私囊可有四五千金之多然則工程之堅實與否報銷之虛捏與否俱可想見擬請 飭下山東撫臣變通章程設法稽察庶宿弊全除而工程亦當有起色矣一泛溢成口地方宜申明賠修舊例以防隨意改名也查舊例有賠修一條原爲作工委員含糊堵築一經汎漲又復刷開而設乃近來山東通習於泛溢時則謀派承修於到工後則謂水盛無從措手直俟秋冬初水落漲消隨意堆壙卽報合龍公款飽乎私囊官階列乎上保迨至來年汎漲豈有不再行衝刷之理及其泛溢成口在工諸員恐賠修之自累於是取舊口鄰近之村名任意更換撫臣亦無從查核率卽照稟入奏在事各員規避之罪尙小其舊年作工之混冒致令顛沛之民復遭昏墊此罪豈容誅乎現在在工各員既有上游中游下游之別各有專責擬請 飭部詳議立案凡上游中游下游每一段中甲年開口者乙年若再開口卽著總辦以下照甲年報銷銀數賠出一半庶作工時不敢不認真而復開改名之弊不禁自止矣一武弁宜認真巡察也山東沿河設有河勇五營專司防汛有險則作占盤掃無事則晝夜巡邏一有狼窩蟻穴滾溜墊陷等險立卽報驗修築自可立臻平穩消患未然乃近日陋

習專事逢迎上憲經過固必安排供給列隊送迎卽一佐貳一幕賓亦必酒食款留小隊護送而本分之河務早置之度外矣推原其故不過因缺額短餉借逢迎爲護庇之計擬請 飭下山東撫臣嚴行禁止

所有辦差供給送迎餽遺等舊習盡爲革除倘有委員藉端需索准其揭稟查辦各該營官既無護符自不敢不認真盡職庶河營非逆旅而防守亦資得力矣以上四條委係多年積弊所在若能盡行革除自當永慶安瀾臣既有所聞不敢不言 上諭御史宋伯魯奏山東黃河積弊已深敬陳管見一摺所稱冒

領朦銷宜嚴定處分收發各料宜設法稽查申明賠修舊例員弁認真巡察各條著山東巡撫嚴飭在事各員痛除積弊認真辦理嚴定處分一條並著凡有河務省分督撫認真查察遇有劣員務當嚴參懲辦

○乙巳

上詣建福宮

孝貞顯皇后聖容前行禮

○張之萬因病奏請開缺不允仍予假兩月

○以聶

緝渠爲江蘇布政使丁峻爲浙江按察使

○諭本年六月以來大雨時行永定河水勢漫溢順直各屬被

災小民蕩析離居深堪憫惻加恩著將江蘇河運漕米五萬石江北河運漕米五萬石卽在天津就近截留放賑其隨漕輕齎等銀兩一併核數提扣以備順直賑撫之需著王文韶會同孫家鼐胡燏棻督飭所屬詳查災區輕重酌量分別核實散放務使實惠及民不准稍有弊混用副朝廷軫念民艱至意○丙午諭御史潘慶瀾奏東三省每年監斃人犯太多請飭整頓一摺各省問刑衙門遇有人命重案理宜隨審

隨結以免拖累若如所奏奉天吉林黑龍江所屬近年以來每遇人命案件延不辦結以致監候各犯多斃囹圄其餘軍流徒罪各案尤多積弊殊非矜恤庶獄之道著依克唐阿延茂恩澤通飭所屬立限清釐認真整頓倘有前項情弊卽行從嚴參辦以挽積習而恤民生○丁未饒應祺奏甘回不靖勘修古城奇台縣城以資防守估計需銀二萬六千餘兩擬於歲撥新疆善後經費項下動用不另請款下部知之○戊申 上詣 奉先殿 壽皇殿行禮○總理各國事務衙門奏溯查各關設立稅務司徵收稅鈔於同治二年間歲徵銀六百餘萬兩議給各稅司辦公費銀七十萬二百兩旋於六年添設山海東海等關歲徵銀八百餘萬兩加給經費銀至七十四萬八千二百兩嗣於光緒元年各關歲徵銀一千一百餘萬兩增添經費銀一百九萬八千二百兩續於六年新開口岸增設瓊海北海甌海蕪湖宜昌五關共新舊十九關歲徵銀一千三百餘萬兩加給經費銀一百十五萬八千二百兩復於十四年各關歲徵銀一千五百餘萬兩並添設九龍拱北二關及購買緝私巡船加給經費銀一百七十三萬八千二百兩又於十九年添設龍州蒙自重慶及朝鮮之漢城各關加給經費銀一百八十五萬八千二百兩歷經總理衙門奏准遵行在案茲據總稅務司赫德呈稱通商各關稅務司經費一事前經先後奏准每年撥發關平銀一百八十五萬八千二百兩之數而除臺南淡水兩關經費每年七萬二千兩停發外現在各關實發一百

七十八萬六千二百兩查西藏前關亞東一關尚未徵收稅課然不能不動用經費且新添蘇關杭關沙市思茅等關均經派有稅務司等前往惟前項奏准經費數目並無此新開之關在內且各關今年上半年所徵之數較去年上半年所徵約多至一百七萬兩舊有之關公務較繁辦公人等因之較多又加郵政在在均需費用祇可請准添撥以資辦公應請將年款一百八十五萬八千二百兩奏准之數改爲一百九十六萬八千兩并開具各關應添經費數目清單請飭各關於光緒二十二年八月二十五日起按月發給申請覈辦前來臣等查總理衙門原議各關收稅逾一千五百萬兩准其加增經費比年以來因收稅逐漸加增迭經奏請照章添給各該關經費均奉諭旨遵行在案今因收稅加增并添設蘇州杭州沙市思茅等關又加郵政在在均須費用該稅司所請加給經費尙屬實在情形查請撥之數每月加銀九千一百五十兩每年合加銀十萬九千八百兩合前撥共銀一百九十六萬八千兩臣等公同酌核其所請增撥之數尙非無因應如所請照案撥給如蒙俞允當由總理各國事務衙門分咨南北洋大臣暨各行各關監督並總稅務司於光緒二十二年八月二十五日如數加撥遵照辦理得旨如所議行○鹿傳霖奏瞻番糾眾出巢盤踞章谷勒令土司投彼不服開導添兵抗拒經臣飛飭督辦夷務知府羅以禮酌帶兵勇馳往再行開導如再抗違不能不示以兵威一面飭催周萬順迅統各營馳赴打箭爐

駐紮以爲聲援並添調漢土官兵籌辦各情先後奏明在案臣卷查光緒十五年瞻對番官青饒策披異
常暴虐激變瞻民羣起叛藏驅逐番官願仍歸川屬准駐藏大臣長庚咨川委員查辦彼時若乘勢將瞻
地收回勢順而易藏中亦無可置詞乃當日計不出此僅將番官正法仍由藏另換番官且更添一堪布
卽今日滋事革撤不遵之對堆奪吉及夷喜吐布丹也又復增派藏兵八百名從此愈肆兇橫瞻民益遭
塗炭敢怒而不敢言積怨蓄憤蓋已久矣臣查悉情形因密飭羅以禮周萬順設法多覓間諜持示前往
曉諭以離瞻民之心而收其內亂之效茲據羅以禮先後稟報酌帶長勝右營勇丁兩哨督同阜和營都
司劉炳勳帶營兵百名明正土兵二百名先行馳往章谷飭長勝右營參將李飛龍催調糧運全營駐紮
道塢以顧後路羅以禮行抵章谷駐紮舊寨與該番所踞新寨僅一矢之遙當派把總盧鳴揚親往開導
該番仍敢玩抗相持添派番官防衛約有千數百人於寨牆徧開礮眼并有朱窩土司及喇嘛寺從逆之
人相助情殊叵測羅以禮當卽催調李飛龍全營并就近飭調麻書孔撒白利三土司各派土兵五百名
酌發口糧銀兩隨同官軍來章谷防剿至五月二十三二十五等日李飛龍及各土兵先後馳抵章谷二
十六晨起李飛龍令營勇十二人前往河溝取水就近在舊寨左邊察看地勢意欲分駐詎附近民房藏
有瞻番三十餘人齊出爭鬪仔仲所踞新寨近接民房乃竟號召番兵由新寨鎗眼施放鎗礮以暗擊明

連聲不絕長勝右營勇丁未及防備當被轟斃二名受傷八名羅以禮等見兵端已開其曲在彼且軍心
忿不可遏亦卽督飭我軍率同麻書明正土兵放鎗抵禦連傷瞻番六名其時然馬公山梁住紮之番部
牛廠娃亦率馬隊數十名接應瞻番向前助逆幸我軍前哨勇隊駐紮老河口聞警應援左哨弁兵白
利土兵亦各奮力堵截當時鎗傷瞻番四人生擒兩人並割取首級兩顆奪馬二匹番衆馬隊紛紛敗散
我軍勇力太單亦卽收隊自固午後仔仲新寨與毗連之朱窩逆寨復用鎗礮向舊寨環擊彈密如雨徹
夜不息羅以禮等所居寨樓窗壁均爲摧破彈子直落臥榻前我軍多方避禦僅傷斃勇丁一名羅以禮
一面飛調周萬順提督全軍迅速馳援二十七日早瞻番馬隊三百餘人自右山凹馳突而前意在撲我
右哨營房羅以禮等分督孔撒麻書白利土兵馬隊上前迎敵並令前哨營勇由老河口出隊截其歸路
前後夾擊鎗礮齊施漢土各兵無不奮勇爭先瞻番多受鎗傷力不能支向山後敗竄而去適有章谷喇
嘛寺僧衆素與瞻番勾結見其敗竄輒率黨衆數百人由山梁而下施放排鎗爲瞻番接應我軍詰其不
應助逆該喇嘛藉口昨日前哨鎗斃喇嘛二名係其寺僧稱欲報復嗣見我軍得勝始行潛退是日午刻
山後擦窪地方復有朱窩從逆馬隊百餘人前來搗戰羅以禮卽與李飛龍劉炳勳各帶兵勇分督孔撒
麻書白利頭人帶領馬隊分路堵剿當卽擊傷數人逆衆敗去紛紛落馬逃入附近礪卡躲避我軍奪獲

戰馬六十六匹當賞給出力士兵均各歡欣鼓舞羅以禮等因念所住舊寨近接朱瞻逆巢若不設法攻克斷難安枕且慮爲其所乘隨親督弁勇由舊寨連放劈山大礮轟破瞻番分紮對面水寨傷斃番賊多名餘均四散逃去又用鎗礮擊破右山朱窩逆寨頭層牆窗數處傷斃逆衆甚多該逆防禦尙嚴未能得手是夜二鼓密遣孔撒麻書白利頭人暗帶士兵潛出寨後復將瞻番分紮民礮二座放火焚燒番衆驚潰朱窩逆衆亦於是夜將章谷後山民房燒燬二所并施放鎗礮擊我舊寨傷斃放礮麻書士兵一名我軍亦放鎗回擊傷斃朱逆寨內賊番二名此瞻番狙擊我軍先開兵聲并朱窩土司章谷喇嘛助逆我軍連日攻剿獲勝固守舊寨之實在情形也二十九日瞻番堅守不出我軍亦稍事休息彼此均於寨內施放鎗礮轟斃朱逆數人我軍亦傷明正士兵一人三十日瞻番新添馬隊二百餘人高踞山巔俯視舊寨勢欲猛撲羅以禮劉炳勳等密飭麻書汎弁劉煥章角洛汎弁盧鳴揚分督麻書孔撒士兵一由山前要路直上堵截一由山後繞出斷其後路瞻番分兵抗拒羅以禮復添派漢土兵勇分道應援合力攻剿接戰時許盧鳴揚親放洋鎗各軍亦鎗礮齊施奮勇猛進傷斃瞻逆多人逆衆潰敗適值兩大風烈收隊回營羅以禮等探聞瞻民連年被番官苛虐均已離心思欲內屬此次除藏中番兵數百外所帶瞻兵多由威逼而來機有可乘因卽遵臣前諭揀派親信職員羅堉等密購間諜混入瞻番賊巢親往切實開導以

覘民心之向背并傳齊各土兵頭人示以重賞飭令整齊隊伍多帶鎗礮定於夜間襲取朱瞻逆巢期於一鼓而克是日午刻據土兵報稱朱窩馬隊昨藏擦窪未去意在牽制我軍伺隙竊發必須先爲驅逐以除肘腋之患羅以禮等隨派員弁督率漢土兵勇馳赴擦窪朱逆據險憑高拚死拒戰我軍鼓勇而前進無退相持一時之久朱逆力不能支紛紛敗竄傷斃數逆生擒一人奪獲青稞十數袋我軍亦被鎗斃麻書土兵一名鎗傷衛勇二名遂將擦窪逆寨焚燬整隊而還羅以禮等以關外險遠糧運甚難現糧僅敷數日遲則饑潰堪虞而瞻番朱窩分紮各寨甚爲堅固非用火攻難期遽破而四面分紮小寨勢同犄角又非先克小寨難期得手是夜二鼓天氣陰霾當飭穆秉文密派衛隊勇丁并麻書孔撒土兵多帶火種分路潛往將番逆分紮右後前三處寨礮同時舉火焚燒喊聲震天逆衆不知我軍虛實驚潰逃散適派往之間諜羅增等亦皆帶同麻書孔撒頭人次日工巴等陸續回營均稱瞻兵本已離心今聞開導無不感泣本欲縛獻仔仲無如其父兄弟均被拘繫恐遭族滅懇稍寬假若太兵直搗瞻巢該民等必爲內應願爲 聖朝良民而章谷大頭人旋巴尙噶饒登生珠達吉亦願具結隨同大兵進瞻先驅招徠羅以禮等復會商熟計我軍兵單糧絀勢難持久瞻民旣已輸誠事機宜速遂與李飛龍劉炳勳等於三更後調集勇隊土兵多方激勵密授機宜奮勇向前先攻朱窩逆寨乃該寨與瞻番新寨均環施鎗礮彈子

如兩我軍鏖戰不退肉薄而登立時攻破朱窩逆寨衆向山後逃竄時已五鼓復督兵勇分攻新寨逆番
仔仲見朱窩逆寨已破知勢不支心無鬪志黎明時率衆奪路出寨奔突狼奔亦向山後遁逸兩寨先後
攻克番衆自相蹈躐及被轟被焚死者不計其數我軍自辰至午窮追亂山之中人馬困乏該處林深箐
密恐有埋伏當卽收隊駐兵搜捕餘匪將新舊兩寨附近番逆悉數驅逐一面安撫連日受害良番復業
安居此又連日攻剿出奇制勝連破逆寨瞻番朱窩敗潰逃竄之實在情形也臣等迭據羅以禮等稟報
各情當以各寨攻克瞻番遁逃軍事雖轉危爲安而瞻逆仔仲則忠扎霸乘間遁去前已參革之番官對
堆奪吉夷喜吐布丹尙據瞻對老果均屬罪大惡極必須聲罪致討且瞻民久苦苛虐情殷效順亦應速
爲拯救其朱窩土司甘心從逆章谷喇嘛寺僧衆通匪助勢均難寬縱現檄催提督周萬順統領防邊各
營迅速前進相機分別勦辦已據報於六月初八日出關因慮兵力尙單復添調兩營陸續前進并調裏
塘明正各土司土兵聽候調遣以爲後繼飭令周萬順與羅以禮會商定議妥籌進兵直擣瞻果現仍密
購間諜開導瞻民若能得手網獻番官逆首三人卽可兵不血刃收回瞻地改設漢官管理收歸內屬仰
託 皇上威福則邊民獲安疆圉可固以後一切事宜均可次第圖維實爲大幸至章谷朱窩之案仍勒
令朱窩交出從逆助戰之人倘能畏威懾服尙可寬其既往由羅以禮等駐守章谷究明擇尤嚴辦以儆

其餘仍調集兩造追取朱窩奪去章谷印信號紙秉公剖斷倘敢仍前抗玩亦由羅以禮分兵勦辦攻取朱窩改土歸流其喇嘛寺僧眾亦勒令交出助逆之人懲辦以昭炯戒臣等惟有督飭周萬順羅以禮等審慎從事斷不稍涉輕率致有貽誤蓋事機所值兵衅已開不得不大張撻伐爲一勞永逸之計臣等一面咨明駐藏幫辦大臣訥欽譯行商上詳敘瞻番不遵開導抗拒梗頑狙擊我軍先開兵釁情形責以不能約束曲庇瞻番之咎以致積禍稔惡上干天討師直爲壯該藏番當無可置喙也伏查關外用兵艱苦十倍內地道路非常荒僻糧運尤艱難萬狀我軍戰勝則番部土司無不懾服皆爲我用稍有挫失則羣起而與我爲難事將不可收拾此次羅以禮等率領偏師深入重地未敢輕動尙冀再三開導曲示包容不意逆番驕橫狙擊我軍先開兵衅朱窩從逆喇嘛助戰其時周提督萬順所統防邊各營因籌備糧運尙未出關救援不及我軍所駐之地四面逼近逆巢鎗礮環施萬難駐足瞻番恃其地險彌固冀老我師又復時添馬隊憑高窺伺乘我之隙且我軍兵單糧絀飢潰堪虞稍有動搖邊事將不堪設想羅以禮堅忍不撓從容禦敵出奇制勝迭克堅巢以孤立無助之軍當四面烏張之衆卒使朱窩破走瞻番遁逃轉危爲安厥功甚偉候補知府羅以禮膽識深穩調度有方請免補知府以道員仍留四川儘先補用併賞加按察使銜署阜和左營都司留川儘先遊擊劉炳勳出奇制勝謀勇兼優請免補遊擊以參將留